

# Piera oahppá čuoigat




Heidi Guttorm Einarsen  
Govaid sárgon: Charlotte Helgeland



Dá lea Piera. Son lea 5 jahkásaš ja ássá Skierrevuomis. Piera illuda juohke beaivve vuolgit mánáidgárdái. Doppe sus leat skihpárat ja earát geaid son dovdá. Muhtimin son stoahká Elliin, ja muhtomin Lássiin. Eará háviid fas Ovlláin. Piera liiko buoremusat Lemehii. Lemet bargá mánáidgárddis ja lea hui šiega.



Piera liiku buđaldit jaskes bargguid. Son liiko bihttaspealu bardit, sárgut ja legoiguin hukset. Olgun son liiku stoahkat biillaiguin sáddokássas, ovttas Ovlláin.



Muhtomin bohtet amasolbmot mánáidgárdái. Dalle Piera ballá, go son ii dieđe maid sii áigot dadjat ja bargat ja son ii dovdda sin. Piera čiehkáda dalle Lemeha duohkái, ja ii hálit dearvvahit ja manná sierra latnjii ja gidde uvssa.



Lea čakčadálvi ja muohta. Piera guovttos áhčiin finaiga buvddas ikte oastimin sabehiid. Piera ii liiko sabehiidda. Son ii máhte čuoigat ja čierastit, nu mo diet stuorra gánddat ja nieiddat. Áhčči dadjá: “Dán dálvve moai áigo ollu čuoiggadit ja čierastit.” Muhto Piera ii hálit čuoigat, go son han ii máhte dan.



Piera ja Lemet mannaba olggos. Lea ija muohtán ja buohkat leat olgun muohttagis stoahkamin. Soai geahččaba duostilis gánddaide ja nieiddaide geat čuoiggadit láhtus ja čierastit luohkás. Lea hirbmat hušša ja reaškkas. “Ge-hččet!” , čurve Ánde, ja luoitila iežas luohkás vulos ja njuike guhkás vel. Earát doapmalit luohká bajás. Piera ja Lemet čuožžuba das guhkká ja geahččaba.



Piera háliidivčče oahppat čierastit sabeiiguin, muhto son ii duostta. Son ballá ahte son gahččá ja bávččaga. Muhto eanemus son ballá das ahte earát galget oaidnit ahte son lea nu fuotni ahte ii máhte čuoigat ja čierastit nu mo sii. Lemet lea hui šiega ja veahkeha Piera vuos sabetskuovaid coggat ja sabeiid bidjat julggiide.





Piera vázzá sabeiiguin siste. Ovddus maŋos. Dat manná bures, dassá go son guossala ja gahččá. Dat ii bávččat, muhto Piera hirbmadit suorgana. Lemet veahkeha su čuoččat fas ja jedđe su. Soai hállaba dan birra ahte dat ii lean nu váralaš gahččat. Son ii bávččagan gal, dušše suorganii.





Pieras leat dál sihke sabehat ja soappit. Lemet čájeha mo son galgá nuppi sabeha hoigat ovdellii ja dorjet soppiin, das to nuppe láhkai. Piera ballá ahte earát galget fuomášit ahte son ii máhte čuoigat, ja hárdit su dainna. Son ii hálit dahkat nu mo Lemet čájeha. Son heahpana, suhtta ja čieru ja velleda ja čievččasta eret buot, sihke sabetskuovaid ja sabehiid. Dasto son viehkala sisa fas ja speige uvssa gitta. Son háliida bihttaspealu baicce bardit ja sárgut.



Lemet boahdá maid. Soai čohkkába bálddalaga ja sárguba. Lemet muitala ahte son maid balai čuoigamis, čierasteamis, ja vuodjamis ja ollu eará go son lei unni. Eanemus son balai das ahte earát galge bilkidit ja hárdit dahje cuiggodit su go son ii máhttán. Soai hállaba guhkká dan birra ja mearrideaba oktii vel geahččalit.



Piera ja Lemet hárjehallaba juohke beaivve, ja Piera oahppá veahážiid mielde ja máhttá eambo ahte eambo juohke beaivve. Álggos son dieđusge gahčai dávjá, muhto dat ii dahkan maidege go muohta lea dimis. Piera suhtai ja čierui mángii, muhto dadistaga buorránii balánsa ja son čuoiggai johtileappot ja johtileappot juohke háve.



Dál lea Pieras somá ja son illuda vuolgit olggos čuoigat. Fargga sáhttiba áhčiin vuolgit čuoiggadit. Piera jurddaša ahte son ihttin áigu čájehit áhččái man čeahppi son lea šaddan. Piera lea dál oahppan ahte jos áigu duostat ja šaddat čeahppi ja falli mas nu, de ferte duostat álgit ja dasto ollu ja dávjá dan dahkat. Maiddái stuorra gánddat ja nieiddat geat čierastit ja njuikejit, ja čuiget hui johtilit leat oktii ferten álgit ja ollu ja dávjá čuoigan, čierastan ja njuiken.

Ja, dieđát go maid? Ovdal juovllaid lei Piera čierastaddago-  
ahtán maid.

Ii oktage máhte riegádusas maidege, muhto dadis go mii  
stuorrut, de mii oahppat vázzit, hállat, njuikut, dánsut, vie-  
hkat, lávlut ja ollu eará, maid mii hárjehallat ja máhttit.  
Muhtin áššiid ferte ollu ja guhkká hárjehallat ovdal lihkos-  
tuvvat.

## Gažaldagat mat sáhttet leat ávkin ságasteapmái?

- Mas ballá Piera?
- Lea go eará maid Piera sáhtášii hárjehallat?
- Maid don áiggut hárjehallat?
- Mas don balat?
- Maid don máhtát?





